

## **MANIFESTO 8 DE MARZO “DÍA INTERNACIONAL DAS MULLERES”**

O 8 de Marzo é o Día Internacional das Mulleres, conmemoración dunha data histórica e reivindicativa da Igualdade real de mulleres e homes. Pasou un século e aprendemos que a igualdade de dereitos, políticos, sociais e laborais hai que reforzala cada día, porque cando non se avanza retrocédese, e hoxe as ameazas para alcanzar a igualdade son reais e non difusas. O contexto internacional cambiou a peor cos novos responsables políticos que, lexos de reforzar a democracia, debilítana atacando a dous dos seus pilares fundamentais, o Estado de Dereito e a Igualdade.

Xeracións das nosas mulleres viñeron loitando pola liberdade, as nosas avoas, as nosas nais, incluso as nosas bisavoas. Unha liberdade que hoxe, grazas a elas, é un patrimonio colectivo que hai que seguir defendendo cada día porque ninguén nola da, pero algúns queren arrebatárnola.

A “Marcha das Mulleres” en todo o mundo contra o Presidente Trump foi a expresión dun berro de liberdade e dignidade para defender os dereitos humanos, a diversidade, a igualdade, a inclusión, os dereitos reprodutivos e a condena ó racismo. Máis de seis millóns de mulleres saíron á rúa para manifestar o seu rechazo ás políticas machistas da nova Administración norteamericana. Se o Estado debe garantir a orde social, hoxe obsérvanse moitos nubarróns no horizonte. Como o desafío institucional dalgúns gobernantes, que menosprezando a importancia das institucións e os acordos internacionais, vulneran os Convenios ratificados polos seus países fronte a tódalas formas de discriminación contra as mulleres. É especialmente repugnante a intervención do Eurodiputado polaco, Janusz Korwin-Mikke, que afirmou que “as mulleres deben gañar menos que os homes porque son máis débiles, máis pequenas e menos intelixentes”.

Aquí en España, incúmprese a Lei Orgánica 3/2007 para a Igualdade Efectiva de Mulleres e Homes. Por exemplo, incúmprese as medidas específicas sobre os procesos de selección e para a provisión de postos de traballo no seo da Administración Xeral do Estado, tamén nas Forzas e Corpos de Seguridade e nas Forzas Armadas.

## **CASA DA MULLER**

Ref: 8 de marzo 2017

Asunto: MANIFESTO

Sabemos que a discriminación, a desigualdade e o patriarcado seguen estando presentes na sociedade española de hoxe en día. Preocúpanos o retroceso significativo en combater e erradicar a violencia de xénero, incompatible coa democracia. A violencia machista continúa medrando, tamén as mulleres asasinadas e as súas fillas e fillos, vítimas todas elas e eles dos maltratadores.

A Subcomisión para un Pacto de Estado contra a Violencia de Xénero é un bo paso pero non suficiente. Hai que previr e garantir a formación en igualdade en tódolos ciclos formativos entre as e os xóvenes. Non obstante, este ano suprimíronse as subvencións ás universidades para a formación en igualdade, así coma os plans de igualdade nas pequenas e medianas empresas. Só educando en igualdade, poderemos vivir en igualdade.

España medrou un 23%, segundo o FMI, no número de persoas en risco de pobreza ou de exclusión social. Son fundamentalmente mulleres e xóvenes. Perdéronse máis de 250.000 postos de traballo femininos. No sector público a destrución de emprego feminino alcanza o 72%. Por primeira vez en 40 anos está caendo a poboación activa feminina. Trala reforma laboral perdéronse 183.000 empregos, dos cales o 60% do emprego asalariado feminino. A perda de emprego feminino triplica a perda de emprego masculino e intensificouse a destrución de emprego feminino indefinido un 68%. O paro feminino rexistrado aumentou ata alcanzar o 51,5%. España atópase no sétimo lugar da UE con maior fenda salarial.

A 1 de xaneiro de 2017, a pensión media dos homes era de 1223,73 € ó mes fronte a 770 € de pensión media das mulleres. Xunto á expulsión das mulleres do mercado laboral, a precarización das condicións laborais e a temporalidade das mulleres que teñen emprego, está o aumento da fenda salarial.

En España as mulleres traballan 21 horas semanais máis que os homes no traballo doméstico. O 82% das persoas cuidadoras principais dos nenos e nenas de 0 a 3 anos son as nais, o 7,5% as avoas e só o 4,8% os pais.

Debemos apostar pola paridade, pola corresponsabilidade, por eliminar a fenda salarial, pola equidade no emprego das mulleres que poñen fin á precarización das súas vidas. Apostamos por combater a trata dos seres humanos con fines de explotación sexual, por defender os dereitos sexuais e reprodutivos e especialmente, polo dereito das mulleres a unha vida libre de violencia.

Non podemos esquecer ás mulleres que teñen que afrontar dificultades engadidas a aquelas que teñen polo mero feito de ser mulleres, como é o caso das mulleres con discapacidade.

**Finalmente, hoxe 8 de marzo queremos:**

-Lembrar a todas as mulleres asasinadas por violencia machista.

-Solidarizarnos coa loita das mulleres en folga de fame en Sol por un Pacto de Estado contra a Violencia de Xénero.

-Unirnos á Folga Internacional de Mulleres, que se celebra hoxe en todo o mundo.

Por último, e como todos os anos, reivindicar hoxe, máis que nunca, o feminismo.

**¡VIVA O 8 DE MARZO!**

**DÍA INTERNACIONAL DAS MULLERES**